六祖大师法宝坛经

东土碑宗六祖	1.思能	大帅	况
	门人	法海	录

行由品第一	2
般若品第二	. 11
疑问品第三	. 17
定慧品第四	. 21
坐禅品第五	. 23
忏悔品第六	. 24
机缘品第七	. 29
顿渐品第八	. 42
护法品第九	. 47
付嘱品第十	. 49

行由品第一

时大师至<u>宝林</u>,<u>韶州韦</u>刺史与官僚入山请师出,于城中<u>大梵寺</u>讲堂为众开缘说法。师升座次,刺史官僚三十余人、儒宗学士三十余人、僧尼道俗一千余人同时作礼,愿闻法要。大师告众曰:"善知识!**菩提自性,本来清净**;**但用此心,直了成佛。**善知识!且听<u>惠能</u>行由得法事意。"

惠能严父,本贯<u>范阳</u>,左降流于<u>岭南</u>,作<u>新州</u>百姓。此身不幸,父又早亡,老母孤遗,移来<u>南海</u>;艰辛贫乏,于市卖柴。时有一客买柴,使令送至客店;客收去,<u>惠能</u>得钱,却出门外,见一客诵经。<u>惠</u>能一闻经语,心即开悟,遂问客诵何经?

客曰: "《金刚经》。"

复问: "从何所来, 持此经典?"

客云: "我从<u>蕲州黄梅县东禅寺</u>来。其寺是五祖<u>忍</u>大师在彼主化 ,门人一千有余;我到此中礼拜,听受此经。大师常劝僧俗,但持《 金刚经》,即自见性,直了成佛。"

惠能闻说,宿昔有缘,乃蒙一客取银十两与<u>惠能</u>,令充老母衣粮 ,教便往<u>黄梅</u>参礼五祖。<u>惠能</u>安置母毕,即便辞违,不经三十余日, 便至<u>黄梅</u>,礼拜五祖。

祖问曰: "汝何方人?欲求何物?"

惠能对曰: "弟子是<u>岭南新州</u>百姓,远来礼师,惟求作佛,不求 第 2 頁,共 55 頁 余物。"

祖言: "汝是岭南人,又是獦獠,若为堪作佛?"

惠能曰: "人虽有南北,佛性本无南北; 獦獠身与和尚不同,佛性有何差别?"五祖更欲与语,且见徒众总在左右,乃令随众作务。

惠能曰: "<u>惠能</u>启和尚,弟子自心常生智慧,不离自性,即是福田。未审和尚教作何务?"

祖云:"这獦獠根性大利!汝更勿言,着槽厂去。"惠能退至后院,有一行者差惠能破柴踏碓,经八月余。

祖一日忽见<u>惠能</u>,曰: "吾思汝之见可用,恐有恶人害汝,遂不 与汝言,汝知之否?"

惠能曰: "弟子亦知师意,不敢行至堂前,令人不觉。"

祖一日唤诸门人总来: "吾向汝说:世人生死事大,汝等终日只求福田,不求出离生死苦海。自性若迷,福何可救?汝等各去自看智慧,取自本心般若之性,各作一偈,来呈吾看。若悟大意,付汝衣法,为第六代祖。火急速去,不得迟滞,思量即不中用!见性之人,言下须见。若如此者,抡刀上阵,亦得见之。"

众得处分,退而递相谓曰: "我等众人,不须澄心用意作偈,将 呈和尚,有何所益? <u>神秀</u>上座现为教授师,必是他得。我辈谩作偈颂 ,枉用心力。"诸人闻语,总皆息心,咸言: "我等已后依止<u>秀</u>师,何 烦作偈?" <u>神秀</u>思惟:"诸人不呈偈者,为我与他为教授师。我须作偈,将 呈和尚;若不呈偈,和尚如何知我心中见解深浅?我呈偈意,求法即 善,觅祖即恶,却同凡心夺其圣位奚别?若不呈偈,终不得法。大难 !大难!"

五祖堂前,有步廊三间,拟请供奉<u>卢珍</u>画《楞伽经》变相及五祖血脉图,流传供养。<u>神秀</u>作偈成已,数度欲呈,行至堂前,心中恍惚,遍身汗流,拟呈不得;前后经四日,一十三度呈偈不得。<u>秀</u>乃思惟:"不如向廊下书着,从他和尚看见,忽若道好,即出礼拜,云是<u>秀</u>作;若道不堪,枉向山中数年,受人礼拜,更修何道?"是夜三更,不使人知,自执灯,书偈于南廊壁间,呈心所见。偈曰:

身是菩提树,心如明镜台,时时勤拂拭,勿使惹尘埃。

<u>秀</u>书偈了,便却归房,人总不知。<u>秀</u>复思惟: "五祖明日见偈欢喜,即我与法有缘;若言不堪,自是我迷,宿业障重,不合得法。圣意难测!"房中思想,坐卧不安,直至五更。

祖已知<u>神秀</u>入门未得,不见自性。天明,祖唤<u>卢</u>供奉来,向南廊壁间绘画图相,忽见其偈,报言:"供奉!却不用画,劳尔远来。经云:『凡所有相,皆是虚妄。』但留此偈,与人诵持。依此偈修,免堕恶道;依此偈修,有大利益。"令门人炷香礼敬,尽诵此偈,即得见性。门人诵偈,皆叹:"善哉!"

祖三更唤<u>秀</u>入堂,问曰: "偈是汝作否?" 第 4 頁, 共 55 頁 <u>秀</u>言: "实是<u>秀</u>作,不敢妄求祖位,望和尚慈悲,看弟子有少智 慧否?"

祖曰: "汝作此偈,未见本性,只到门外,未入门内。如此见解,觅无上菩提,了不可得。无上菩提,须得言下识自本心、见自本性,不生不灭。于一切时中,念念自见,万法无滞,一真一切真,万境自如如:如如之心,即是真实。若如是见,即是无上菩提之自性也。汝且去一两日思惟,更作一偈,将来吾看;汝偈若入得门,付汝衣法。"<u>神秀</u>作礼而出。又经数日,作偈不成,心中恍惚,神思不安,犹如梦中,行坐不乐。

复两日,有一童子于碓坊过,唱诵其偈。<u>惠能</u>一闻,便知此偈未 见本性;虽未蒙教授,早识大意。遂问童子曰:"诵者何偈?"

童子曰: "尔这獦獠不知,大师言『世人生死事大』,欲得传付衣法,令门人作偈来看。若悟大意,即付衣法为第六祖。<u>神秀</u>上座于南廊壁上,书无相偈,大师令人皆诵,依此偈修,免堕恶道;依此偈修,大有利益。"

惠能曰: "我亦要诵此,结来生缘。上人!我此踏碓八个余月, 未曾行到堂前,望上人引至偈前礼拜。"童子引至偈前礼拜,<u>惠能</u>曰 : "<u>惠能</u>不识字,请上人为读。"

时有江州别驾,姓张名日用,便高声读。

惠能闻已,遂言: "亦有一偈,望别驾为书。" 第 5 頁, 共 55 頁 别驾言:"汝亦作偈,其事希有!"

惠能向别驾言: "欲学无上菩提,不可轻于初学。下下人有上上智,上上人有没意智。若轻人,即有无量无边罪。"

别驾言: "汝但诵偈,吾为汝书。汝若得法,先须度吾,勿忘此言。"

惠能偈曰: "菩提本无树,明镜亦非台,本来无一物,何处惹尘 埃。"

书此偈已,徒众总惊,无不嗟讶,各相谓言:"奇哉!不得以貌取人,何得多时使他肉身菩萨?"

祖见众人惊怪,恐人损害,遂将鞋擦了偈,曰:"亦未见性。" 众以为然。

次日,祖潜至碓坊,见<u>能</u>腰石舂米,语曰:"求道之人,为法忘 躯,当如是乎?"

乃问曰: "米熟也未?"

惠能曰: "米熟久矣,犹欠筛在。"祖以杖击碓三下而去。<u>惠能</u>即会祖意,三鼓入室,祖以袈裟遮围,不令人见;为说《金刚经》,至 "应无所住而生其心",<u>惠能</u>言下大悟—"一切万法,不离自性"。

遂启祖言: 何期自性,本自清净; 何期自性,本不生灭;

何期自性,本自具足;何期自性,本无动摇;

何期自性,能生万法。"

祖知悟本性,谓<u>惠能</u>曰: "不识本心,学法无益;若识自本心,见自本性,即名丈夫、天人师、佛。"三更受法,人尽不知,便传顿教及衣。云: "汝为第六代祖,善自护念,广度有情,流布将来,无令断绝。听吾偈曰: **有情来下种,因地果还生;无情既无种,无性亦无生**。"

祖复曰:"昔<u>达摩</u>大师初来此土,人未之信,故传此衣,以为信体,代代相承。法则以心传心,皆令自悟自解;自古佛佛惟传本体,师师密付本心。衣为争端,止汝勿传;若传此衣,命如悬丝。汝须速去,恐人害汝。"

惠能启曰: "向甚处去?"

祖云: "逢怀则止,遇会则藏。"

惠能三更领得衣,云:"<u>能</u>本是南中人,素不知此山路,如何出得江口?"

五祖言: "汝不须忧,吾自送汝。"祖相送直至<u>九江</u>驿,祖令上船,五祖把橹自摇。

惠能言: "请和尚坐,弟子合摇橹。"

祖云: "合是吾渡汝。"

惠能曰: "迷时师度,悟了自度;度名虽一,用处不同。<u>惠能</u>生 在边方,语音不正,蒙师付法,今已得悟,只合自性自度。"

祖云: "如是,如是!以后佛法,由汝大行。汝去三年,吾方逝 第7頁,共55頁

世。汝今好去,努力向南;不宜速说,佛法难起。"

惠能辞违祖已,发足南行,两月中间,至<u>大庾岭</u>。逐后数百人来 ,欲夺衣。一僧俗姓<u>陈</u>,名<u>惠明</u>,先是四品将军,性行麤慥,极意参 寻,为众人先,趁及惠能。

惠能掷下衣于石上,曰:"此衣表信,可力争耶?"能隐草莽中。

惠明至,提掇不动,乃唤云: "行者! 行者! 我为法来,不为衣来。" <u>惠能</u>遂出,盘坐石上。

惠明作礼云:"望行者为我说法。"

惠能云: "汝既为法而来,可屏息诸缘,勿生一念,吾为汝说。" <u>明</u>良久。

惠能云: "不思善,不思恶,正与么时,那个是<u>明</u>上座本来面目?"惠明言下大悟。

复问云: "上来密语密意外,还更有密意否?"

惠能云: "与汝说者,即非密也。汝若返照,密在汝边。"

<u>明</u>曰: "<u>惠明</u>虽在<u>黄梅</u>,实未省自己面目,今蒙指示,如人饮水 ,冷暖自知。今行者即<u>惠明</u>师也。"

惠能曰: "汝若如是,吾与汝同师黄梅,善自护持。"

明又问: "惠明今后向甚处去?"

<u>惠能</u>曰:"逢<u>袁</u>则止,遇<u>蒙</u>则居。"<u>明</u>礼辞。

惠能后至<u>曹溪</u>,又被恶人寻逐,乃于<u>四会</u>避难猎人队中,凡经一 第 8 頁,共 55 頁 十五载,时与猎人随宜说法。猎人常令守网,每见生命,尽放之。每至饭时,以菜寄煮肉锅;或问,则对曰:"但吃肉边菜。"

一日,思惟: "时当弘法,不可终遯。"遂出至<u>广州法性寺</u>,值 <u>印宗</u>法师讲《涅盘经》。时有风吹旛动,一僧曰"风动",一僧曰"旛 动",议论不已。

惠能进曰: "不是风动,不是幡动,仁者心动。"一众骇然。<u>印</u>宗延至上席,征诘奥义,见<u>惠能</u>言简理当,不由文字。

宗云: "行者定非常人,久闻黄梅衣法南来,莫是行者否?"

惠能曰: "不敢!"宗于是作礼,告请传来衣,出示大众。

宗复问曰: "黄梅付嘱,如何指授?"

惠能曰: "指授即无,惟论见性,不论禅定解脱。"

宗曰: "何不论禅定解脱?"

能曰: "为是二法,不是佛法。佛法是不二之法。"

宗又问: "如何是佛法不二之法?"

惠能曰: "法师讲《涅盘经》,明佛性是佛法不二之法。如<u>高贵</u> <u>德王</u>菩萨白佛言: 『犯四重禁、作五逆罪及一阐提等,当断善根佛性 否? 』佛言: 『善根有二: 一者常,二者无常;佛性非常非无常,是故 不断,名为不二。一者善,二者不善;佛性非善非不善,是名不二』。 蕴之与界,凡夫见二,智者了达其性无二;无二之性,即是佛性。"

<u>印宗</u>闻说,欢喜合掌,言:"某甲讲经,犹如瓦砾;仁者论义, 第 9 頁,共 55 頁 行由品第一

犹如真金。"于是为<u>惠能</u>薙发,愿事为师。<u>惠能</u>遂于菩提树下,开<u>东</u> 山法门。

"惠能于东山得法,辛苦受尽,命似悬丝,今日得与使君、官僚、僧尼、道俗同此一会,莫非累劫之缘?亦是过去生中供养诸佛,同种善根,方始得闻如上顿教得法之因。教是先圣所传,不是<u>惠能</u>自智。愿闻先圣教者,各令净心,闻了各自除疑,如先代圣人无别。"一众闻法,欢喜作礼而退。

般若品第二

次日,<u>韦</u>使君请教。师升座,告大众曰:"总净心念,摩诃般若 波罗蜜多。"

复云: "善知识! 菩提般若之智, 世人本自有之; 只缘心迷, 不能自悟, 须假大善知识示导见性。当知愚人、智人佛性本无差别, 只缘迷悟不同, 所以有愚有智。吾今为说『摩诃般若波罗蜜』法, 使汝等各得智慧。志心谛听, 吾为汝说。"

善知识!世人终日口念般若,不识自性般若,犹如说食不饱;口 但说空,万劫不得见性,终无有益。

善知识! "摩诃般若波罗蜜"是梵语,此言大智慧到彼岸。此须心行,不在口念。口念心不行,如幻如化,如露如电;口念心行,则心口相应。本性是佛,离性无别佛。

何名"摩诃"?"摩诃"是大。心量广大,犹如虚空,无有边畔,亦无方圆大小,亦非青黄赤白,亦无上下长短,亦无瞋无喜、无是无非、无善无恶、无有头尾。诸佛刹土,尽同虚空;世人妙性本空,无有一法可得;自性真空,亦复如是。

善知识! 莫闻吾说空,便即着空。第一莫着空,若空心静坐,即着无记空。

善知识!世界虚空能含万物色像,日月星宿、山河大地、泉源溪涧、草木丛林、恶人善人、恶法善法、天堂地狱、一切大海、<u>须弥</u>诸

山,总在空中;世人性空,亦复如是。

善知识! 自性能含万法是大,万法在诸人性中。若见一切人恶之与善,尽皆不取不舍,亦不染着,心如虚空,名之为大,故曰"摩诃"

善知识! 迷人口说,智者心行。又有迷人空心静坐,百无所思, 自称为大;此一辈人不可与语,为邪见故。

善知识!心量广大,遍周法界;用即了了分明,应用便知一切; 一切即一,一即一切;去来自由,心体无滞,即是般若。

善知识!一切般若智皆从自性而生,不从外入,莫错用意,名为 真性自用,一真一切真。心量大事,不行小道;口莫终日说空,心中 不修此行;恰似凡人自称国王,终不可得;非吾弟子!

善知识!何名"般若"?"般若"者,<u>唐</u>言智慧也。一切处所, 一切时中,念念不愚,常行智慧,即是般若行。一念愚,即般若绝; 一念智,即般若生。世人愚迷,不见般若;口说般若,心中常愚;常 自言我修般若,念念说空,不识真空。般若无形相,智慧心即是;若 作如是解,即名般若智。

何名"波罗蜜"?此是西国语,<u>唐</u>言到彼岸,解义离生灭。着境生灭起,如水有波浪,即名为此岸;离境无生灭,如水常通流,即名为彼岸,故号"波罗蜜"。

善知识! 迷人口念, 当念之时, 有妄有非; 念念若行, 是名真性 第 12 頁, 共 55 頁 。悟此法者,是般若法;修此行者,是般若行。不修即凡,一念修行, 自身等佛。

善知识! 凡夫即佛, 烦恼即菩提。前念迷即凡夫, 后念悟即佛; 前念着境即烦恼, 后念离境即菩提。

善知识! "摩诃般若波罗蜜",最尊最上最第一,无住无往亦无来,三世诸佛从中出。当用大智慧,打破五蕴烦恼尘劳。如此修行,定成佛道,变三毒为戒定慧。

善知识!我此法门,从一般若生八万四千智慧。何以故?为世人有八万四千尘劳。若无尘劳,智慧常现,不离自性。悟此法者,即是无念。无忆、无着,不起诳妄,用自真如性,以智慧观照,于一切法不取不舍,即是见性成佛道。

善知识!若欲入甚深法界及般若三昧者,须修般若行。持诵《金刚般若经》即得见性,当知此经功德无量无边,经中分明赞叹,莫能具说。此法门是最上乘,为大智人说,为上根人说;小根小智人闻,心生不信。何以故?譬如天龙下雨于<u>阎浮提</u>,城邑聚落悉皆漂流,如漂草叶;若雨大海,不增不减。若大乘人,若最上乘人,闻说《金刚经》,心开悟解,故知本性自有般若之智,自用智慧常观照故,不假文字。譬如雨水,不从天有,元是龙能兴致,令一切众生、一切草木、有情无情,悉皆蒙润,百川众流却入大海,合为一体;众生本性般若之智,亦复如是。善知识!小根之人闻此顿教,犹如草木根性小者

,若被大雨,悉皆自倒,不能增长;小根之人,亦复如是。元有般若之智,与大智人更无差别,因何闻法不自开悟?缘邪见障重,烦恼根深,犹如大云覆盖于日,不得风吹,日光不现。般若之智亦无大小,为一切众生自心迷悟不同。迷心外见,修行觅佛,未悟自性,即是小根;若开悟顿教,不执外修,但于自心常起正见,烦恼尘劳常不能染,即是见性。

善知识!内外不住,去来自由,能除执心,通达无碍;能修此行,与《般若经》本无差别。善知识!一切修多罗及诸文字、大小二乘、十二部经,皆因人置,因智慧性方能建立。若无世人,一切万法本自不有,故知万法本自人兴,一切经书因人说有。缘其人中有愚有智,愚为小人,智为大人。愚者问于智人,智者与愚人说法;愚人忽然悟解心开,即与智人无别。

善知识!不悟,即佛是众生;一念悟时,众生是佛。故知万法尽在自心,何不从自心中顿见真如本性?《菩萨戒经》云:"我本元自性清净。"若识自心见性,皆成佛道。《净名经》云:"实时豁然,还得本心。"

善知识!我于<u>忍</u>和尚处,一闻言下便悟,顿见真如本性。是以将此教法流行,令学道者顿悟菩提,各自观心,自见本性。若自不悟,须觅大善知识解最上乘法者,直示正路。是善知识有大因缘,所谓"化导令得见性"。一切善法,因善知识能发起故。三世诸佛、十二部

经在人性中本自具有,不能自悟,须求善知识指示方见。若自悟者,不假外求;若一向执谓『须他善知识望得解脱』者,无有是处。何以故?自心内有知识自悟,若起邪迷,妄念颠倒,外善知识虽有教授,救不可得。若起正真般若观照,一刹那间,妄念俱灭。若识自性,一悟即至佛地。

善善知识!智慧观照,内外明彻,识自本心。若识本心,即本解脱;若得解脱,即是般若三昧;般若三昧即是无念。何名无念?若见一切法,心不染着,是为无念。用即遍一切处,亦不着一切处;但净本心,使六识出六门,于六尘中无染无杂,来去自由,通用无滞,即是般若三昧,自在解脱,名无念行。若百物不思,当令念绝,即是法缚,即名边见。善知识!悟无念法者,万法尽通;悟无念法者,见诸佛境界;悟无念法者,至佛地位。

善知识! 后代得吾法者,将此顿教法门于同见同行,发愿受持,如事佛故,终身而不退者,定入圣位。然须传授从上以来默传分付,不得匿其正法;若不同见同行,在别法中不得传付,损彼前人,究竟无益。恐愚人不解,谤此法门,百劫千生断佛种性。

善知识! 吾有一"无相颂", 各须诵取。在家、出家但依此修; 若不自修, 惟记吾言, 亦无有益。听吾颂曰:

说通及心通,如日处虚空;唯传见性法,出世破邪宗。 法即无顿渐,迷悟有迟疾;只此见性门,愚人不可悉。 第 15 頁,共 55 頁

说即虽万般, 合理还归一。烦恼暗宅中, 常须生慧日; 邪来烦恼至,正来烦恼除:邪正俱不用,清净至无余。 菩提本自性,起心即是妄;净心在妄中,但正无三障。 世人若修道,一切尽不妨;常自见己过,与道即相当。 色类自有道,各不相妨恼。离道别觅道,终身不见道; 波波度一生, 到头还自懊。欲得见真道, 行正即是道: 自若无道心,闇行不见道。若真修道人,不见世间过; 若见他人非,自非却是左。他非我不非,我非自有过: 但自却非心,打除烦恼破;憎爱不关心,长伸两脚卧。 欲拟化他人,自须有方便:勿令彼有疑,即是自性现。 佛法在世间,不离世间觉:离世觅菩提,恰如求兔角。 正见名出世, 邪见名世间; 邪正尽打却, 菩提性宛然。 此颂是顿教,亦名大法船: 迷闻经累劫, 悟则刹那间。

师复曰: "今于<u>大梵寺</u>说此顿教,普愿法界众生言下见性成佛。"时<u>韦</u>使君与官僚道俗闻师所说,无不省悟。一时作礼,皆叹: "善哉!何期<u>岭南</u>有佛出世。"

疑问品第三

一日,<u>韦</u>刺史为师设大会斋。斋讫,刺史请师升座,同官僚士庶肃容再拜,问曰:"弟子闻和尚说法,实不可思议。今有少疑,愿大慈悲,特为解说。"

师曰: "有疑即问,吾当为说。"

韦公曰: "和尚所说,可不是达摩大师宗旨乎?"

师曰: "是。"

公曰: "弟子闻<u>达摩</u>初化<u>梁武帝</u>,帝问云: 『朕一生造寺度僧、 布施设斋,有何功德?』<u>达摩</u>言: 『实无功德。』弟子未达此理,愿和 尚为说。"

师曰: "实无功德,勿疑先圣之言。<u>武帝</u>心邪,不知正法。造寺 度僧、布施设斋,名为求福,不可将福便为功德。功德在法身中,不 在修福。"

师又曰: "见性是功,平等是德;念念无滞,常见本性真实妙用,名为功德。内心谦下是功,外行于礼是德;自性建立万法是功,心体离念是德;不离自性是功,应用无染是德。若觅功德法身,但依此作,是真功德。若修功德之人,心即不轻,常行普敬。心常轻人,吾我不断,即自无功;自性虚妄不实,即自无德;为吾我自大,常轻一切故。善知识!念念无间是功,心行平直是德;自修性是功,自修身是德。善知识!功德须自性内见,不是布施供养之所求也,是以福德

与功德别。武帝不识真理,非我祖师有过。"

刺史又问曰: "弟子常见僧俗念<u>阿弥陀佛</u>,愿生西方。请和尚说 ,得生彼否?愿为破疑。"

师言:"使君善听,惠能与说。世尊在舍卫城中,说西方引化, 经文分明, 去此不远。若论相说, 里数有十万八千, 即身中十恶八邪 ,便是说远。说远,为其下根;说近,为其上智。人有两种,法无两般 : 迷悟有殊, 见有迟疾。迷人念佛, 求生于彼: 悟人自净其心。所以 佛言: 『随其心净, 即佛土净。』使君东方人, 但心净即无罪; 虽西方 人,心不净亦有愆。东方人造罪,念佛求生西方;西方人造罪,念佛 求生何国?凡愚不了自性,不识身中净土,愿东愿西:悟人在处一般 , 所以佛言: 『随所住处恒安乐。』使君心地但无不善, 西方去此不 遥; 若怀不善之心, 念佛往生难到。今劝善知识! 先除十恶, 即行十 万;后除八邪,乃过八千。念念见性,常行平直,到如弹指,便睹弥 陀。使君但行十善,何须更愿往生?不断十恶之心,何佛即来迎请? 若悟无生顿法,见西方只在刹那;不悟,念佛求生,路遥如何得达? 惠能与诸人移西方于刹那间,目前便见,各愿见否?"

众皆顶礼云: "若此处见,何须更愿往生?愿和尚慈悲,便现西方,普令得见。"

师言: "大众! 世人自色身是城,眼耳鼻舌是门。外有五门,内有意门。心是地,性是王; 王居心地上。性在,王在; 性去,王无。性第 18 頁,共 55 頁

在,身心存;性去,身心坏。佛向性中作,莫向身外求。自性迷,即是众生;自性觉,即是佛。慈悲,即是<u>观音</u>;喜舍,名为<u>势至</u>;能净,即释迦;平直,即<u>弥陀</u>。人我是<u>须弥</u>,邪心是海水,烦恼是波浪,毒害是恶龙,虚妄是鬼神,尘劳是鱼鳖,贪瞋是地狱,愚痴是畜生。善知识!常行十善,天堂便至;除人我,<u>须弥</u>倒;去邪心,海水竭;烦恼无,波浪灭;毒害忘,鱼龙绝。自心地上觉性如来,放大光明,外照六门清净,能破六欲诸天。自性内照,三毒即除,地狱等罪一时消灭,内外明彻,不异西方。不作此修,如何到彼?"

大众闻说,了然见性,悉皆礼拜,俱叹:"善哉!"唱言:"普 愿法界众生,闻者一时悟解。"

师言: "善知识! 若欲修行,在家亦得,不由在寺。在家能行,如东方人心善;在寺不修,如西方人心恶。但心清净,即是自性西方。"

<u>韦</u>公又问: "在家如何修行?愿为教授!"

师言: "吾与大众说<u>无相颂</u>,但依此修,常与吾同处无别。若不 作此修,剃发出家,于道何益?颂曰:

> 心平何劳持戒?行直何用修禅?恩则孝养父母,义则上下相怜, 让则尊卑和睦,忍则众恶无喧。若能钻木出火,淤泥定生红莲。 苦口的是良药,逆耳必是忠言,改过必生智慧,护短心内非贤。 日用常行饶益,成道非由施钱。菩提只向心觅,何劳向外求玄? 听说依此修行,西方只在目前。"

疑问品第三

师复曰: "善知识! 总须依偈修行, 见取自性, 直成佛道。时不相待, 众人且散, 吾归<u>曹溪</u>。众若有疑, 却来相问。"时刺史官僚、在会善男信女, 各得开悟, 信受奉行。

定慧品第四

师示众云: "善知识! 我此法门以定慧为本,大众勿迷,言定慧别。定慧一体,不是二;定是慧体,慧是定用;即慧之时定在慧,即定之时慧在定。若识此义,即是定慧等学。诸学道人,莫言先定发慧、先慧发定各别。作此见者,法有二相。口说善语,心中不善,空有定慧,定慧不等;若心口俱善,内外一如,定慧即等。自悟修行,不在于诤;若诤先后,即同迷人。不断胜负,却增我法,不离四相。

善知识! 定慧犹如何等? 犹如灯光。有灯即光, 无灯即暗; 灯是 光之体, 光是灯之用。名虽有二, 体本同一。此定慧法, 亦复如是。"

师示众云: "善知识!一行三昧者,于一切处,行、住、坐、卧常行一直心是也。《净名经》云:『直心是道场,直心是净土。』莫心行谄曲,口但说直;口说一行三昧,不行直心。但行直心,于一切法勿有执着。迷人着法相,执一行三昧,直言常坐不动,妄不起心,即是一行三昧。作此解者,即同无情,却是障道因缘。善知识!道须通流,何以却滞?心不住法,道即通流;心若住法,名为自缚。若言常坐不动,是只如舍利弗宴坐林中,却被维摩诘诃。善知识!又有人教坐,看心观静,不动不起,从此置功。迷人不会,便执成颠,如此者众。如是相教,故知大错。"

师示众云: "善知识!本来正教,无有顿渐,人性自有利钝。迷 人渐修,悟人顿契,自识本心,自见本性,即无差别,所以立顿渐之 假名。

善知识! 我此法门从上以来, 先立无念为宗, 无相为体, 无住为本。无相者, 于相而离相; 无念者, 于念而无念; 无住者, 人之本性。

于世间善恶好丑,乃至冤之与亲,言语触刺欺争之时,并将为空,不思酬害,念念之中不思前境。若前念、今念、后念,念念相续不断,名为系缚。于诸法上,念念不住,即无缚也。此是以无住为本。

善知识! 外离一切相, 名为无相; 能离于相,则法体清净。此是以无相为体。

善知识!于诸境上心不染,曰无念;于自念上常离诸境,不于境上生心。若只百物不思,念尽除却,一念绝即死,别处受生,是为大错。学道者思之。若不识法意,自错犹可,更劝他人;自迷不见,又谤佛经。所以立无念为宗。

善知识! 云何立无念为宗? 只缘口说见性迷人,于境上有念,念上便起邪见,一切尘劳妄想从此而生。自性本无一法可得,若有所得,妄说祸福,即是尘劳邪见。故此法门,立无念为宗。

善知识!无者无何事?念者念何物?无者,无二相,无诸尘劳之心;念者,念真如本性。真如即是念之体,念即是真如之用。真如自性起念,非眼耳鼻舌能念。真如有性,所以起念;真如若无,眼耳色声当时即坏。善知识!真如自性起念,六根虽有见闻觉知,不染万境,而真性常自在,故经云:『能善分别诸法相,于第一义而不动。』"

坐禅品第五

师示众云: "此门坐禅,元不着心,亦不着净,亦不是不动。若言着心,心原是妄,知心如幻,故无所著也。若言着净,人性本净,由妄念故,盖覆真如,但无妄想,性自清净。起心着净,却生净妄。妄无处所,著者是妄;净无形相,却立净相,言是工夫。作此见者,障自本性,却被净缚。善知识!若修不动者,但见一切人时,不见人之是非善恶过患,即是自性不动。善知识!迷人身虽不动,开口便说他人是非长短好恶,与道违背。若着心着净,即障道也。"

师示众云: "善知识!何名坐禅?此法门中,无障无碍,外于一切善恶境界,心念不起,名为坐;内见自性不动,名为禅。

善知识!何名禅定?外离相为禅,内不乱为定。外若着相,内心即乱;外若离相,心即不乱。本性自净自定,只为见境思境即乱。若见诸境心不乱者,是真定也。善知识!外离相即禅,内不乱即定;外禅内定,是为禅定。《菩萨戒经》云:『我本性元自清净。』善知识!于念念中,自见本性清净,自修自行,自成佛道。"

忏悔品第六

时大师见<u>广韶</u>洎四方士庶骈集山中听法,于是升座告众曰:"来!诸善知识!此事须从自性中起。于一切时,念念自净其心,自修自行,见自己法身,见自心佛,自度、自戒,始得不假到此。既从远来,一会于此,皆共有缘,今可各各胡跪,先为传『自性五分法身香』,次授『无相忏悔』。"众胡跪。

师曰: "一、戒香:即自心中无非、无恶、无嫉妒、无贪瞋、无劫害,名戒香。二、定香:即睹诸善恶境相,自心不乱,名定香。三、慧香:自心无碍,常以智慧观照自性,不造诸恶,虽修众善,心不执着,敬上念下,矜恤孤贫,名慧香。四、解脱香:即自心无所攀缘,不思善,不思恶,自在无碍,名解脱香。五、解脱知见香:自心既无所攀缘善恶,不可沉空守寂,即须广学多闻,识自本心,达诸佛理,和光接物,无我、无人,直至菩提,真性不易,名解脱知见香。

善知识!此香各自内熏,莫向外觅。今与汝等授无相忏悔,灭三世罪,令得三业清净。善知识!各随我语,一时道:『弟子等,从前念、今念及后念,念念不被愚迷染;从前所有恶业愚迷等罪,悉皆忏悔,愿一时销灭,永不复起。弟子等,从前念、今念及后念,念念不被憍诳染;从前所有恶业憍诳等罪,悉皆忏悔,愿一时销灭,永不复起。弟子等,从前念、今念及后念,念念不被嫉妒染;从前所有恶业嫉妒等罪,悉皆忏悔,愿一时销灭,永不复起。

善知识!已上是为『无相忏悔』。云何名忏?云何名悔?忏者, 忏其前愆;从前所有恶业、愚迷、憍诳、嫉妒等罪,悉皆尽忏,永不 复起,是名为忏。悔者,悔其后过;从今已后,所有恶业、愚迷、憍诳、嫉妒等罪,今已觉悟,悉皆永断,更不复作,是名为悔,故称忏悔。 凡夫愚迷,只知忏其前愆,不知悔其后过。以不悔故,前愆不灭,后 过又生。前愆既不灭,后过复又生,何名忏悔?

善知识! 既忏悔已,与善知识发『四宏誓愿』,各须用心正听: 自心众生无边誓愿度,自心烦恼无边誓愿断,自性法门无尽誓愿学, 自性无上佛道誓愿成。善知识! 大家岂不道: 众生无边誓愿度? 恁么 道且不是惠能度。善知识!心中众生,所谓邪迷心、诳妄心、不善心 、嫉妒心、恶毒心, 如是等心, 尽是众生, 各须自性自度, 是名真度。 何名自性自度?即自心中邪见、烦恼、愚痴众生,将正见度。既有正 见, 使般若智打破愚痴迷妄众生, 各各自度。邪来正度, 迷来悟度, 愚来智度, 恶来善度, 如是度者, 名为真度。又烦恼无边誓愿断, 将 自性般若智,除却虚妄思想心是也。又法门无尽誓愿学,须自见性, 常行正法,是名真学。又无上佛道誓愿成,既常能下心,行于真正, 离迷、离觉,常生般若,除真、除妄,即见佛性,即言下佛道成。常念 修行,是愿力法。善知识!今发四宏愿了,更与善知识授『无相三归 依戒』。

善知识! 归依觉,两足尊;归依正,离欲尊;归依净,众中尊。

从今日去,称觉为师,更不归依邪魔外道。以自性三宝常自证明,劝善知识归依自性三宝。佛者觉也,法者正也,僧者净也。自心归依觉,邪迷不生,少欲知足,能离财色,名两足尊。自心归依正,念念无邪见,以无邪见故,即无人我贡高贪爱执着,名离欲尊。自心归依净,一切尘劳爱欲境界,自心皆不染着,名众中尊。若修此行,是自归依。凡夫不会,从日至夜受三归戒。若言归依佛,佛在何处?若不见佛,凭何所归?言却成妄。善知识!各自观察,莫错用心。经文分明言自归依佛,不言归依他佛。自佛不归,无所依处。今既自悟,各须归依自心三宝,内调心性,外敬他人,是自归依也。

善知识!既归依自三宝竟,各各志心,吾与说『一体三身自性佛』,令汝等见三身,了然自悟自性。总随我道: 『于自色身归依清净法身佛,于自色身归依圆满报身佛,于自色身归依千百亿化身佛。』善知识!色身是舍宅,不可言归。向者三身佛,在自性中,世人总有,为自心迷,不见内性,外觅三身如来,不见自身中有三身佛。汝等听说!令汝等于自身中见自性有三身佛。此三身佛从自性生,不从外得。

何名清净法身佛?世人性本清净,万法从自性生。思量一切恶事,即生恶行;思量一切善事,即生善行。如是诸法在自性中,如天常清、日月常明,为浮云盖覆,上明下暗;忽遇风吹云散,上下俱明,万象皆现。世人性常浮游,如彼天云。善知识!智如日,慧如月;智

慧常明,于外着境,被妄念浮云盖覆自性,不得明朗。若遇善知识,闻真正法,自除迷妄,内外明彻,于自性中,万法皆现。见性之人,亦复如是。此名清净法身佛。善知识!自心归依自性,是归依真佛。自归依者,除却自性中不善心、嫉妒心、谄曲心、吾我心、诳妄心、轻人心、慢他心、邪见心、贡高心及一切时中不善之行,常自见己过,不说他人好恶,是自归依。常须下心,普行恭敬,即是见性通达,更无滞碍,是自归依。

何名圆满报身?譬如一灯能除千年暗,一智能灭万年愚。莫思向前,已过不可得;常思于后,念念圆明,自见本性。善恶虽殊,本性无二。无二之性,名为实性。于实性中,不染善恶,此名圆满报身佛。自性起一念恶,灭万劫善因;自性起一念善,得恒沙恶尽,直至无上菩提。念念自见,不失本念,名为报身。

何名千百亿化身?若不思万法,性本如空;一念思量,名为变化。思量恶事,化为地狱;思量善事,化为天堂。毒害,化为龙蛇;慈悲,化为菩萨。智慧,化为上界;愚痴,化为下方。自性变化甚多,迷人不能省觉。念念起恶,常行恶道;回一念善,智慧即生。此名自性化身佛。

善知识! 法身本具, 念念自性自见, 即是报身佛。从报身思量, 即是化身佛。自悟自修自性功德, 是真归依。皮肉是色身, 色身是宅舍, 不言归依也。但悟自性三身, 即识自性佛。吾有一无相颂, 若能

诵持,言下令汝积劫迷罪,一时销灭。颂曰:

迷人修福不修道,只言修福便是道;布施供养福无边,心中三恶元来造。 拟将修福欲灭罪,后世得福罪还在。但向心中除罪缘,各自性中真忏悔; 忽悟大乘真忏悔,除邪行正即无罪。学道常于自性观,即与诸佛同一类。 吾祖唯传此顿法,普愿见性同一体。若欲当来觅法身,离诸法相心中洗。 努力自见莫悠悠,后念忽绝一世休。若悟大乘得见性,虔恭合掌至心求。"

师言: "善知识!总须诵取,依此修行,言下见性。虽去吾千里,如常在吾边;于此言下不悟,即对面千里,何勤远来?珍重,好去!"一众闻法,靡不开悟,欢喜奉行。

机缘品第七

师自<u>黄梅</u>得法,回至<u>韶州曹侯村</u>,人无知者。时有儒士<u>刘志略</u>, 礼遇甚厚。<u>志略</u>有姑为尼,名<u>无尽藏</u>,常诵<u>大涅盘经</u>。师暂听,即知 妙义,遂为解说。

尼乃执卷问字,师曰:"字即不识,义即请问。"

尼曰: "字尚不识,焉能会义?"

师曰:"诸佛妙理,非关文字。"

尼惊异之, 遍告里中耆德云: "此是有道之士, 宜请供养。"

有<u>魏武侯</u>玄孙<u>曹叔良</u>及居民,竞来瞻礼。时<u>宝林</u>古寺,自<u>隋</u>末兵 火已废,遂于故基重建梵宇,延师居之,俄成宝坊。师住九月余日, 又为恶党寻逐,师乃遁于前山,被其纵火焚草木,师隐身挨入石中得 免。石今有师趺坐膝痕及衣布之纹,因名"避难石"。师忆五祖<u>怀</u>、 <u>会</u>止藏之嘱,遂行隐于二邑焉。

僧<u>法海</u>, <u>韶州曲江</u>人也。初参祖师,问曰:"即心即佛,愿垂指谕。"师曰:"前念不生即心,后念不灭即佛;成一切相即心,离一切相即佛。吾若具说,穷劫不尽。听吾偈曰:

即心名慧,即佛乃定;定慧等持,意中清净。

悟此法门,由汝习性;用本无生,双修是正。"

法海言下大悟,以偈赞曰:

即心元是佛,不悟而自屈。我知定慧因,双修离诸物。

僧<u>法达</u>,<u>洪州</u>人,七岁出家,常诵<u>法华经</u>。来礼祖师,头不至地,祖河曰:"礼不投地,何如不礼?汝心中必有一物,蕴习何事耶?"

曰: "念法华经,已及三千部。"

祖曰:"汝若念至万部,得其经意,不以为胜,则与吾偕行。汝今负此事业,都不知过。听吾偈曰:

礼本折慢幢,头奚不至地?有我罪即生,忘功福无比。"

师又曰:"汝名什么?"

曰: "法达。"

师曰: "汝名法达,何曾达法?"复说偈曰:

汝今名<u>法达</u>,勤诵未休歇。空诵但循声,明心号菩萨。 汝今有缘故,吾今为汝说;但信佛无言,莲花从口发。

<u>达</u>闻偈,悔谢曰: "而今而后,当谦恭一切。弟子诵法华经,未 解经义,心常有疑,和尚智慧广大,愿略说经中义理。"

师曰:"<u>法达</u>,法即甚达,汝心不达;经本无疑,汝心自疑。汝 念此经,以何为宗?"

达曰: "学人根性暗钝,从来但依文诵念,岂知宗趣?"

师曰: "吾不识文字,汝试取经诵一遍,吾当为汝解说。"

法达即高声念经,至譬喻品,师曰:"止!此经元来以因缘出世为宗,纵说多种譬喻,亦无越于此。何者因缘?经云:『诸佛世尊,唯以一大事因缘故,出现于世。』一大事者,佛之知见也。世人外迷

着相,内迷着空。若能于相离相,于空离空,即是内外不迷。若悟此 法,一念心开,是为开佛知见。佛,犹觉也,分为四门:开觉知见、示 觉知见、悟觉知见、入觉知见。若闻开示, 便能悟入, 即觉知见, 本 来真性而得出现。汝慎勿错解经意,见他道『开示悟入』,自是佛之 知见,我辈无分。若作此解,乃是谤经毁佛也。彼既是佛,已具知见 , 何用更开?汝今当信佛知见者,只汝自心,更无别佛。盖为一切众 生自蔽光明, 贪爱尘境, 外缘内扰, 甘受驱驰, 便劳他世尊从三昧起 ,种种苦口,劝令寝息,莫向外求,与佛无二,故云开佛知见。吾亦 劝一切人,于自心中常开佛之知见。世人心邪,愚迷造罪,口善心恶 , 贪瞋、嫉妒、谄佞、我慢, 侵人害物, 自开众生知见。若能正心, 常 生智慧, 观照自心, 止恶行善, 是自开佛之知见。汝须念念开佛知见 , 勿开众生知见。开佛知见, 即是出世; 开众生知见, 即是世间。汝 若但劳劳执念,以为功课者,何异牦牛爱尾?"

达曰: "若然者,但得解义,不劳诵经耶?"

师曰: "经有何过,岂障汝念?只为迷悟在人,损益由己。口诵 心行,即是转经;口诵心不行,即是被经转。听吾偈曰:

心迷法华转,心悟转法华。诵经久不明,与义作雠家。

无念念即正,有念念成邪;有无俱不计,长御白牛车。"

<u>达</u>闻偈,不觉悲泣,言下大悟,而告师曰:"<u>法达</u>从昔已来,实 未曾转法华,乃被法华转。" 再启曰: "经云: 『诸大声闻乃至菩萨,皆尽思共度量,不能测佛智。』今令凡夫但悟自心,便名佛之知见,自非上根,未免疑谤。 又经说三车,羊鹿牛车与白牛之车,如何区别?愿和尚再垂开示。"

师曰: "经意分明,汝自迷背。诸三乘人不能测佛智者,患在度量也。饶伊尽思共推,转加悬远。佛本为凡夫说,不为佛说,此理若不肯信者,从他退席。殊不知坐却白牛车,更于门外觅三车。况经文明向汝道『唯一佛乘,无有余乘』,若二、若三,乃至无数方便、种种因缘、譬喻言词,是法皆为一佛乘故。汝何不省?三车是假,为昔时故;一乘是实,为今时故。只教汝去假归实,归实之后,实亦无名。应知所有珍财尽属于汝,由汝受用,更不作父想,亦不作子想,亦无用想,是名持法华经。从劫至劫,手不释卷;从昼至夜,无不念时也。"达蒙启发,踊跃欢喜,以偈赞曰:

经诵三千部,<u>曹溪</u>一句亡。未明出世旨,宁歇累生狂? 羊鹿牛权设,初中后善扬。谁知火宅内,元是法中王。

师曰: "汝今后方可名念经僧也。" 达从此领玄旨,亦不辍诵经。

僧<u>智通</u>,<u>寿州安丰</u>人,初看楞伽经约千余遍,而不会三身四智,礼师求解其义。

师曰: "三身者:清净法身,汝之性也;圆满报身,汝之智也; 千百亿化身,汝之行也。若离本性,别说三身,即名有身无智;若悟 三身无有自性,即名四智菩提。听吾偈曰:

自性具三身,发明成四智;不离见闻缘,超然登佛地。

吾今为汝说,谛信永无迷; 莫学驰求者,终日说菩提。"

通再启曰: "四智之义,可得闻乎?"

师曰: "既会三身,便明四智,何更问耶?若离三身,别谈四智,此名有智无身。即此有智,还成无智。"复说偈曰:

大圆镜智性清净, 平等性智心无病,

妙观察智见非功,成所作智同圆镜;

五八六七果因转,但用名言无实性;

若于转处不留情,繁兴永处那伽定。

"如上转识为智也。教中云: 『转前五识为成所作智, 转第六识为妙观察智, 转第七识为平等性智, 转第八识为大圆镜智。』虽六七因中转, 五八果上转, 但转其名而不转其体也。" 通顿悟性智, 遂呈偈曰:

三身元我体,四智本心明,身智融无碍,应物任随形;起修皆妄动,守住匪真精。妙旨因师晓,终亡染污名。

僧<u>智常,信州贵溪</u>人,髫年出家,志求见性。一日参礼,师问曰 :"汝从何来,欲求何事?"

曰: "学人近往<u>洪州白峰山</u>礼<u>大通</u>和尚,蒙示见性成佛之义,未 决狐疑,远来投礼,伏望和尚慈悲指示。" 师曰:"彼有何言句,汝试举看。"

曰: "<u>智常</u>到彼,凡经三月,未蒙示诲。为法切故,一夕独入丈室,请问如何是某甲本心本性?<u>大通</u>乃曰: 『汝见虚空否?』对曰: 『鬼。』彼曰: 『汝见虚空有相貌否?』对曰: 『虚空无形,有何相貌?』彼曰: 『汝之本性,犹如虚空,了无一物可见,是名正见;无一物可知,是名真知。无有青黄长短,但见本源清净、觉体圆明,即名见性成佛,亦名如来知见。』学人虽闻此说,犹未决了,乞和尚开示。"

师曰: "彼师所说, 犹存见知, 故令汝未了, 吾今示汝一偈:

不见一法存无见,大似浮云遮日面;

不知一法守空知,还如太虚生闪电。

此之知见瞥然兴,错认何曾解方便;

汝当一念自知非,自己灵光常显现。"

常闻偈已,心意豁然,乃述偈曰:

无端起知见,着相求菩提;情存一念悟,宁越昔时迷。 自性觉源体,随照枉迁流。不入祖师室,茫然趣两头。

智常一日问师曰: "佛说三乘法,又言最上乘,弟子未解,愿为 教授。"

师曰: "汝观自本心,莫着外法相,法无四乘,人心自有等差: 见闻转诵是小乘,悟法解意是中乘,依法修行是大乘; 万法尽通, 万 法俱备, 一切不染, 离诸法相, 一无所得, 名最上乘。乘是行义, 不 在口争。汝须自修,莫问吾也。一切时中,自性自如。"<u>常</u>礼谢,执侍终师之世。

僧<u>志道</u>,<u>广州南海</u>人也。请教曰:"学人自出家览<u>涅盘经</u>,十载 有余,未明大意,愿和尚垂诲。"

师曰: "汝何处未明?"

曰: "诸行无常,是生灭法;生灭灭已,寂灭为乐。于此疑惑。" 师曰: "汝作么生疑?"

曰: "一切众生皆有二身,谓色身、法身也。色身无常,有生有灭; 法身有常,无知无觉。经云: 『生灭灭己,寂灭为乐』者,不审何身寂灭、何身受乐? 若色身者,色身灭时,四大分散,全然是苦,苦不可言乐;若法身寂灭,即同草木瓦石,谁当受乐?又法性是生灭之体,五蕴是生灭之用,一体五用。生灭是常,生则从体起用,灭则摄用归体。若听更生,即有情之类,不断不灭;若不听更生,则永归寂灭,同于无情之物。如是则一切诸法被涅盘之所禁伏,尚不得生,何乐之有?"

师曰: "汝是<u>释</u>子,何习外道断常邪见而议最上乘法?据汝所说,即色身外别有法身,离生灭求于寂灭。又推涅盘常乐,言有身受用,斯乃执吝生死、耽着世乐。汝今当知,佛为一切迷人认五蕴和合为自体相,分别一切法为外尘相,好生恶死,念念迁流,不知梦幻虚假,枉受轮回,以常乐涅盘翻为苦相,终日驰求。佛愍此故,乃示涅盘

真乐:刹那无有生相,刹那无有灭相,更无生灭可灭,是则寂灭现前,当现前时,亦无现前之量,乃谓常乐。此乐无有受者,亦无不受者, 岂有一体五用之名?何况更言涅盘禁伏诸法,令永不生,斯乃谤佛毁法。听吾偈曰:

无上大涅盘,圆明常寂照;凡愚谓之死,外道执为断,诸求二乘人,目以为无作;尽属情所计,六十二见本。妾立虚假名,何为真实义?惟有过量人,通达无取舍,以知五蕴法,及以蕴中我,外现众色像,一一音声相;平等如梦幻,不起凡圣见,不作涅盘解,二边三际断。常应诸根用,而不起用想;分别一切法,不起分别想。劫火烧海底,风鼓山相击,真常寂灭乐,涅盘相如是。

吾今强言说,令汝舍邪见。汝勿随言解,许汝知少分。"志道闻偈大悟,踊跃作礼而退。

<u>行思</u>禅师,生<u>吉州安城刘</u>氏。闻<u>曹溪</u>法席盛化,径来参礼。遂问曰:"当何所务,即不落阶级?"。

师曰: "汝曾作什么来?"

曰: "圣谛亦不为。"

师曰: "落何阶级?"

曰: "圣谛尚不为,何阶级之有?"师深器之,令思首众。

一日,师谓曰:"汝当分化一方,无令断绝。"<u>思</u>既得法,遂回 <u>吉州青原山</u>,宏法绍化。谥号<u>宏济</u>禅师。

<u>怀让</u>禅师,<u>金州杜</u>氏子也。初谒<u>嵩山安</u>国师,<u>安</u>发之<u>曹溪</u>参叩。 让至,礼拜,师曰:"甚处来?"

曰: "嵩山。"

师曰: "什么物? 恁么来?"

曰: "说似一物即不中。"

师曰: "还可修证否?"

曰: "修证即不无,污染即不得。"

师曰: "即此不污染,诸佛之所护念。汝既如是,吾亦如是。西 天般若多罗谶: 汝足下出一马驹,踏杀天下人。应在汝心,不须速说 。"<u>让</u>豁然契会,遂执侍左右一十五载,日臻玄奥。后往<u>南岳</u>,大阐 禅宗。敕谥<u>大慧</u>禅师。

<u>永嘉玄觉</u>禅师,<u>温州戴</u>氏子。少习经论,精<u>天台</u>止观法门,因看《维摩经》,发明心地。偶师弟子<u>玄策</u>相访,与其剧谈,出言暗合诸祖。

策云: "仁者得法,师谁?"

曰: "我听方等经论,各有师承,后于《维摩经》悟佛心宗,未有证明者。"

策云: "威音王已前即得,威音王已后无师自悟,尽是天然外道。"

曰: "愿仁者为我证据。"

<u>策</u>云:"我言轻。<u>曹溪</u>有六祖大师,四方云集,并是受法者。若去,则与偕行。"觉遂同策来参,绕师三匝,振锡而立。

师曰: "夫沙门者, 具三千威仪、八万细行。大德自何方而来, 生大我慢?"

觉曰: "生死事大,无常迅速。"

师曰: "何不体取无生、了无速乎?"

曰: "体即无生,了本无速。"

师曰: "如是,如是!"玄觉方具威仪礼拜,须臾告辞。

师曰: "返太速乎?"

曰: "本自非动,岂有速耶?"

师曰:"谁知非动?"

曰: "仁者自生分别。"

师曰:"汝甚得无生之意。"

曰: "无生岂有意耶?"

师曰: "无意,谁当分别?"

曰: "分别亦非意。"

师曰: "善哉!少留一宿。"时谓"一宿觉",后着《证道歌》 ,盛行于世。谥曰"<u>无相</u>大师",时称为"真觉"焉。 禅者<u>智隍</u>,初参五祖,自谓已得正受,庵居长坐,积二十年。师弟子<u>玄策</u>,游方至<u>河朔</u>,闻<u>隍</u>之名,造庵问云:"汝在此作什么?"

<u>隍</u>曰: "入定。"

<u>策</u>云:"汝云入定,为有心入耶?无心入耶?若无心入者,一切 无情草木瓦石应合得定;若有心入者,一切有情含识之流亦应得定。"

隍曰: "我正入定时,不见有有无之心。"

<u>策</u>云: "不见有有无之心,即是常定,何有出入?若有出入,即 非大定。"

隍无对,良久问曰: "师嗣谁耶?"

策云: "我师曹溪六祖。"

隍云: "六祖以何为禅定?"

<u>策</u>云: "我师所说,妙湛圆寂,体用如如,五阴本空,六尘非有,不出不入,不定不乱。禅性无住,离住禅寂;禅性无生,离生禅想;心如虚空,亦无虚空之量。"<u>隍</u>闻是说,径来谒师。

师问云: "仁者何来?" 隍具述前缘。

师云:"诚如所言。汝但心如虚空,不着空见,应用无碍,动静无心,凡圣情忘,能所俱泯,性相如如,无不定时也。"<u>隍</u>于是大悟,二十年所得心,都无影响。其夜,<u>河北</u>士庶闻空中有声云:"<u>隍</u>禅师今日得道。"<u>隍</u>后礼辞,复归<u>河北</u>,开化四众。

一僧问师云: "黄梅意旨,甚么人得?"

师云: "会佛法人得。"

僧云: "和尚还得否?"

师云: "我不会佛法。"

师一日欲濯所授之衣,而无美泉,因至寺后五里许,见山林郁茂,瑞气盘旋;师振锡卓地,泉应手而出,积以为池,乃跪膝浣衣石上。忽有一僧来礼拜,云:"<u>方辩</u>,是<u>西蜀</u>人,昨于<u>南天竺</u>国见<u>达摩</u>大师,嘱<u>方辩</u>速往<u>唐</u>土:『吾传<u>大迦叶</u>正法眼藏及僧伽**棃**,见传六代,于<u>韶州曹溪</u>,汝去瞻礼。』<u>方辩</u>远来,愿见我师传来衣。"

师乃出示,次问:"上人攻何事业?"

曰: "善塑。"

师正色曰: "汝试塑看。"<u>辩</u>罔措。过数日,塑就真相,可高七寸,曲尽其妙。

师笑曰:"汝只解塑性,不解佛性。"

师舒手摩<u>方辩</u>顶,曰:"永为人天福田。"师仍以衣酬之,<u>辩</u>取 衣分为三,一披塑像,一自留,一用棕裹瘗地中,誓曰:"后得此衣, 乃吾出世,住持于此,重建殿宇。"

有僧举卧轮禅师偈云:

<u>卧轮</u>有伎俩,能断百思想,对境心不起,菩提日日长。

师闻之曰:"此偈未明心地,若依而行之,是加系缚。"因示一

偈曰:

惠能没伎俩,不断百思想,对境心数起,菩提作么长。

顿渐品第八

时祖师居曹溪宝林, 神秀大师在荆南玉泉寺。于时两宗盛化, 人皆称南能北秀; 故有南北二宗顿渐之分, 而学者莫知宗趣。

师谓众曰:"法本一宗,人有南北;法即一种,见有迟疾。何名顿渐?法无顿渐,人有利钝,故名顿渐。"然<u>秀</u>之徒众,往往讥南宗祖师不识一字,有何所长?

<u>秀</u>曰:"他得无师之智,深悟上乘,吾不如也。且吾师五祖 亲传衣法,岂徒然哉!吾恨不能远去亲近,虚受国恩。汝等诸人 ,毋滞于此,可往曹溪参决。"

一日,命门人<u>志诚</u>曰:"汝聪明多智,可为吾到<u>曹溪</u>听法。若有所闻,尽心记取,还为吾说。"

<u>志诚</u>禀命至<u>曹溪</u>,随众参请,不言来处。时祖师告众曰:" 今有盗法之人,潜在此会。"<u>志诚</u>即出礼拜,具陈其事。

师曰: "汝从玉泉来,应是细作。"

对曰: "不是!"

师曰: "何得不是?"

对曰: "未说即是,说了不是。"

师曰: "汝师若为示众?"

对曰: "常指诲大众: 住心观静, 长坐不卧。"

师曰: "住心观静,是病非禅;常坐拘身,于理何益? 听吾偈曰:

生来坐不卧,死去卧不坐;一具臭骨头,何为立功课?" 志诚再拜曰:"弟子在秀大师处学道九年,不得契悟;今闻 顿渐品第八

和尚一说,便契本心。弟子生死事大,和尚大慈,更为教示!"

师曰: "吾闻汝师教示学人戒定慧法,未审汝师说戒定慧行相如何?与吾说看。"

<u>诚</u>曰: "<u>秀</u>大师说: 诸恶莫作名为戒, 诸善奉行名为慧, 自净其意名为定。彼说如此, 未审和尚以何法诲人?"

师曰: "吾若言有法与人,即为诳汝。但且随方解缚,假名三昧。如汝师所说戒定慧,实不可思议;吾所见戒定慧又别。"

志诚曰: "戒定慧只合一种,如何更别?"

师曰: "汝师戒定慧,接大乘人;吾戒定慧,接最上乘人。悟解不同,见有迟疾。汝听吾说,与彼同否?吾所说法,不离自性。离体说法,名为相说,自性常迷。须知一切万法皆从自性起用,是真戒定慧法。听吾偈曰:

心地无非自性戒, 心地无痴自性慧,

心地无乱自性定,不增不减自金刚,身去身来本三昧。" <u>诚</u>闻偈,悔谢,乃呈一偈曰:

五蕴幻身, 幻何究竟? 回趣真如, 法还不净。

师然之。复语<u>诚</u>曰:"汝师戒定慧,劝小根智人;吾戒定慧,劝 大根智人。若悟自性,亦不立菩提涅盘,亦不立解脱知见。无一法可 得,方能建立万法。若解此意,亦名佛身,亦名菩提涅盘,亦名解脱 知见。见性之人,立亦得,不立亦得,去来自由,无滞无碍;应用随 作,应语随答,普见化身,不离自性,即得自在神通、游戏三昧,是 名见性。"

志诚再启师曰:"如何是不立义?"

师曰:"自性无非、无痴、无乱,念念般若观照,常离法相,自由自在,纵横尽得,有何可立?自性自悟,顿悟顿修,亦无渐次,所以不立一切法。诸法寂灭,有何次第?"<u>志诚</u>礼拜,愿为执侍,朝夕不懈。

僧<u>志彻</u>,<u>江西</u>人,本姓<u>张</u>,名<u>行昌</u>,少任侠。自南北分化, 二宗主虽亡彼我,而徒侣竞起爱憎。时北宗门人自立<u>秀</u>师为第六 祖,而忌祖师传衣为天下闻,乃嘱<u>行昌</u>来刺师。师心通,预知其 事,即置金十两于坐间。时夜暮,<u>行昌</u>入祖室,将欲加害,师舒 颈就之。行昌挥刃者三,悉无所损。

师曰: "正剑不邪,邪见不正;只负汝金,不负汝命。"<u>行</u> 昌惊仆,久而方苏,求哀悔过,即愿出家。

师遂与金,言:"汝且去,恐徒众翻害于汝,汝可他日易形而来,吾当摄受。"<u>行昌</u>禀旨宵遁,后投僧出家,具戒精进。一日,忆师之言,远来礼觐。

师曰: "吾久念汝,汝来何晚?"

曰: "昨蒙和尚舍罪,今虽出家苦行,终难报德,其惟传法 度生乎?弟子常览<u>涅盘经</u>,未晓常、无常义,乞和尚慈悲,略为 解说。"

师曰: "无常者,即佛性也;有常者,即一切善恶诸法分别心也。" 曰: "和尚所说,大违经文。"

师曰: "吾传佛心印,安敢违于佛经?"

曰: "经说佛性是常,和尚却言无常,善恶诸法,乃至菩提心,皆是无常,和尚却言是常;此即相违,令学人转加疑惑。"

师曰: "<u>涅盘经</u>,吾昔听尼<u>无尽藏</u>读诵一遍,便为讲说,无一字 一义不合经文,乃至为汝,终无二说。"

曰: "学人识量浅昧,愿和尚委曲开示。"

师曰:"汝知否?佛性若常,更说什么善恶诸法,乃至穷劫无有一人发菩提心者?故吾说无常,正是佛说真常之道也。又一切诸法若无常者,即物物皆有自性容受生死,而真常性有不遍之处,故吾说常者,正是佛说真无常义。佛比为凡夫外道执于邪常,诸二乘人于常计无常,共成八倒,故于涅盘了义教中破彼偏见,而显说真常、真乐、真我、真净。汝今依言背义,以断灭无常及确定死常,而错解佛之圆妙最后微言,纵览千遍,有何所益?"行昌忽然大悟,说偈曰:

因守无常心, 佛说有常性; 不知方便者, 犹春池拾砾。 我今不施功, 佛性而现前; 非师相授与, 我亦无所得。

师曰: "汝今彻也, 宜名<u>志彻</u>。" <u>彻</u>礼谢而退。

有一童子, 名神会, 襄阳高氏子。年十三, 自玉泉来参礼。

师曰: "知识远来艰辛,还将得本来否?若有本,则合识主,试 说看!"

会曰: "以无住为本,见即是主。"

师曰: "这沙弥争合取次语。"

会乃问曰: "和尚坐禅,还见不见?"

师以拄杖打三下云: "吾打汝,是痛不痛?"

对曰: "亦痛亦不痛。"

师曰: "吾亦见亦不见。"

神会问: "如何是亦见亦不见?"

师云: "吾之所见,常见自心过愆,不见他人是非好恶,是 以亦见亦不见。汝言亦痛亦不痛如何?汝若不痛,同其木石;若 痛,则同凡夫,即起恚恨。汝向前见不见是二边,痛不痛是生灭 ,汝自性且不见,敢尔弄人!"<u>神会</u>礼拜悔谢。

师又曰:"汝若心迷不见,问善知识觅路;汝若心悟,即自见性,依法修行。汝自迷不见自心,却来问吾见与不见。吾见自知,岂代汝迷?汝若自见,亦不代吾迷。何不自知自见,乃问吾见与不见?"神会再礼百余拜,求谢过愆,服勤给侍,不离左右。

一日,师告众曰: "吾有一物,无头无尾,无名无字,无背 无面,诸人还识否?"

神会出曰: "是诸佛之本源,神会之佛性。"

师曰: "向汝道无名无字,汝便唤作本源佛性;汝向去有把 茆盖头,也只成个知解宗徒。"

祖师灭后,<u>会</u>入<u>京</u>、<u>洛</u>,大宏<u>曹溪</u>顿教。着《显宗记》,盛 行于世,是为<u>荷泽</u>禅师。

师见诸宗难问,咸起恶心,多集座下,愍而谓曰: "学道之人,一切善念、恶念应当尽除; 无名可名, 名于自性; 无二之性, 是名实性; 于实性上, 建立一切教门, 言下便须自见。"诸人闻说, 总皆作礼, 请事为师。

护法品第九

<u>神龙</u>元年上元日,<u>则天</u>、<u>中宗</u>诏云: "朕请<u>安</u>、<u>秀</u>二师宫中供养,万几之暇,每究一乘。二师推让云: 『南方有<u>能</u>禅师,密授<u>忍</u>大师衣法,传佛心印,可请彼问。』今遣内侍<u>薛简</u>,驰诏迎请。愿师慈念,速赴上京。"师上表辞疾,愿终林麓。

<u>薛简</u>曰:"京城禅德皆云:『欲得会道,必须坐禅习定;若不因禅定而得解脱者,未之有也。』未审师所说法如何?"

师曰: "道由心悟,岂在坐也?经云: 『若言如来若坐若卧,是 行邪道。』何故?无所从来,亦无所去。无生无灭,是如来清净禅; 诸法空寂,是如来清净坐;究竟无证,岂况坐耶?"

<u>简</u>曰: "弟子回京,主上必问,愿师慈悲指示心要,传奏两宫及京城学道者;譬如一灯,然百千灯,冥者皆明,明明无尽。"

师云:"道无明暗,明暗是代谢之义;明明无尽,亦是有尽,相待立名。故净名经云:『法无有比,无相待故。』"

<u>简</u>曰:"明喻智慧,暗喻烦恼;修道之人倘不以智慧照破烦恼, 无始生死凭何出离?"

师曰: "烦恼即是菩提,无二无别。若以智慧照破烦恼者,此是 二乘见解、羊鹿等机,上智大根悉不如是。"

<u>简</u>曰: "如何是大乘见解?"

师曰: "明与无明,凡夫见二;智者了达,其性无二;无二之性,即是实性。实性者,处凡愚而不减,在贤圣而不增,住烦恼而不乱,居禅定而不寂,不断不常,不来不去,不在中间及其内外,不生不灭,性相如如,常住不迁,名之曰道。"

护法品第九

<u>简</u>曰: "师说『不生不灭』,何异外道?"

师曰: "外道所说不生不灭者,将灭止生,以生显灭,灭犹不灭,生说不生。我说不生不灭者,本自无生,今亦不灭,所以不同外道。汝若欲知心要,但一切善恶都莫思量,自然得入清净心体,湛然常寂,妙用恒沙。"

<u>简</u>蒙指教,豁然大悟,礼辞归阙,表奏师语。其年九月三日,有诏奖谕师曰:"师辞老疾,为朕修道,国之福田。师若<u>净名</u>托疾<u>毗耶</u>,阐扬大乘,传诸佛心,谈不二法。<u>薛简</u>传师指授如来知见,朕积善余庆,宿种善根,值师出世,顿悟上乘。感荷师恩,顶戴无已。"并奉磨衲袈裟及水晶 ,敕韶州刺史修饰寺宇,赐师旧居为国恩寺焉。

付嘱品第十

师一日唤门人<u>法海</u>、<u>志诚</u>、<u>法达</u>、<u>神会</u>、<u>智常</u>、<u>智通</u>、<u>志彻</u>、<u>志</u> <u>道</u>、<u>法珍</u>、<u>法如</u>等,曰:"汝等不同余人,吾灭度后,各为一方师。吾 今教汝说法,不失本宗。先须举『三科法门』,动用『三十六对』,出 没即离两边,说一切法莫离自性。忽有人问汝法,出语尽双,皆取对 法,来去相因,究竟二法尽除,更无去处。

『三科法门』者,阴、界、入也。阴,是五阴一色、受、想、行、识是也。入,是十二入,外六尘一色、声、香、味、触、法,内六门一眼、耳、鼻、舌、身、意是也。界,是十八界一六尘、六门、六识是也。自性能含万法,名含藏识;若起思量,即是转识。生六识,出六门,见六尘,如是一十八界,皆从自性起用。自性若邪,起十八邪;自性若正,起十八正。若恶用即众生用,善用即佛用。用由何等,由自性有。

对法,外境无情五对一天与地对,日与月对,明与暗对,阴与阳对,水与火对,此是五对也;法相语言十二对一语与法对,有与无对,有色与无色对,有相与无相对,有漏与无漏对,色与空对,动与静对,清与浊对,凡与圣对,僧与俗对,老与少对,大与小对,此是十二对也;自性起用十九对一长与短对,邪与正对,痴与慧对,愚与智对,乱与定对,慈与毒对,戒与非对,直与曲对,实与虚对,险与平对,烦恼与菩提对,常与无常对,悲与害对,喜与瞋对,舍与悭对,进与退对,生与灭对,法身与色身对,化身与报身对,此是十九对也。"

师言:"此三十六对法,若解用,即道贯一切经法,出入即离两边。自性动用,共人言语,外于相离相,内于空离空。若全着相,即

长邪见;若全执空,即长无明。执空之人有谤经,直言『不用文字』。既云『不用文字』,人亦不合语言,只此语言,便是文字之相。又云『直道不立文字』,即此『不立』两字,亦是文字;见人所说,便即谤他言着文字。汝等须知,自迷犹可,又谤佛经;不要谤经,罪障无数。若着相于外,而作法求真,或广立道场,说有无之过患,如是之人,累劫不得见性。但听依法修行,又莫百物不思,而于道性窒碍。若听说不修,令人反生邪念;但依法修行,无住相法施。汝等若悟,依此说、依此用、依此行、依此作,即不失本宗。若有人问汝义,问有,将无对;问无,将有对;问凡,以圣对;问圣,以凡对。二道相因,生中道义,如一问一对,余问一依此作,即不失理也。设有人问:『何名为暗?』答曰:『明是因,暗是缘,明没则暗。』以明显暗,以暗显明,来去相因,成中道义。余问,悉皆如此。汝等于后传法,依此转相教授,勿失宗旨。"

师于<u>太极</u>元年壬子延和七月,命门人往<u>新州国恩寺</u>建塔,仍令促工,次年夏末落成。七月一日,集徒众曰:"吾至八月,欲离世间,汝等有疑,早须相问,为汝破疑,令汝迷尽。吾若去后,无人教汝。"<u>法</u>海等闻悉皆涕泣,惟有神会神情不动亦无涕泣。

师云: "<u>神会</u>小师却得善不善等,毁誉不动,哀乐不生,余者不得。 数年山中,竟修何道?汝今悲泣,为忧阿谁?若忧吾不知去处,吾自 知去处;若吾不知去处,终不预报于汝。汝等悲泣,盖为不知吾去 处;若知吾去处,即不合悲泣。法性本无生灭去来,汝等尽坐,吾与 汝说一偈,名曰《真假动静偈》。汝等诵取此偈,与吾意同,依此修 行,不失宗旨。"众僧作礼,请师说偈。偈曰: 一切无有真,不以见于真;若见于真者,是见尽非真。若能自有真,离假即心真;自心不离假,无真何处真?有情即解动,无情即不动;若修不动行,同无情不动。若觅真不动,动上有不动;不动是不动,无情无佛种;能善分别相,第一义不动。但作如此见,即是真如用。报诸学道人,努力须用意,莫于大乘门,却执生死智。若言下相应,即共论佛义;若实不相应,合掌令欢喜。此宗本无诤,诤即失道意;执逆诤法门,自性入生死。

时徒众闻说偈已, 普皆作礼, 并体师意, 各各摄心, 依法修行, 更不敢诤, 乃知大师不久住世。

法海上座再拜问曰: "和尚入灭之后,衣法当付何人?"

师曰: "吾于<u>大梵寺</u>说法以至于今,钞录流行,目曰: 『法宝坛经』; 汝等守护,递相传授,度诸群生; 但依此说,是名正法。今为汝等说法, 不付其衣, 盖为汝等信根淳熟, 决定无疑, 堪任大事。然据先祖<u>达摩</u>大师付授偈意, 衣不合传。偈曰:

吾本来兹土,传法救迷情;一花开五叶,结果自然成。"

师复曰: "诸善知识!汝等各各净心,听吾说法。若欲成就种智,须达一相三昧、一行三昧。若于一切处而不住相,于彼相中不生憎爱,亦无取舍,不念利益成坏等事,安闲恬静,虚融澹泊,此名『一相三昧』。若于一切处行住坐卧,纯一直心,不动道场,真成净土,此名『一行三昧』。若人具二『三昧』,如地有种,含藏长养,成熟其实;一相、一行,亦复如是。我今说法,犹如时雨普润大地,汝等佛性譬诸种子,遇兹沾洽,悉得发生。承吾旨者,决获菩提;依吾行者

, 定证妙果。听吾偈曰:

心地含诸种, 普雨悉皆萌; 顿悟花情已, 菩提果自成。"

师说偈已,曰:"其法无二,其心亦然;其道清净,亦无诸相。 汝等慎勿观净及空其心,此心本净,无可取舍。各自努力,随缘好去 。"尔时,徒众作礼而退。

大师七月八日忽谓门人曰: "吾欲归新州,汝等速理舟楫。"

大众哀留甚坚,师曰:"诸佛出现,犹示涅盘;有来必去,理亦常然。吾此形骸,归必有所。"

众曰: "师从此去,早晚可回?"

师曰:"叶落归根,来时无口。"

又问曰: "正法眼藏, 传付何人?"

师曰: "有道者得,无心者通。"

又问: "后莫有难否?"

师曰: "吾灭后五六年,当有一人来取吾首,听吾记曰: 『头上 养亲,口里须餐,遇<u>满</u>之难,<u>杨</u>、<u>柳</u>为官。』"

又云: "吾去七十年,有二菩萨从东方来,一出家、一在家,同时兴化,建立吾宗,缔缉伽蓝,昌隆法嗣。"

问曰: "未知从上佛祖应现已来,传授几代?愿垂开示。"

师云: "古佛应世,已无数量,不可计也。今以七佛为始,过去 <u>庄严劫一毗婆尸</u>佛、<u>尸弃</u>佛、<u>毗舍浮</u>佛,今<u>贤劫一拘留孙</u>佛、<u>拘那含</u> <u>牟尼佛、迦叶佛、释迦文</u>佛,是为七佛。<u>释迦文</u>佛首传<u>摩诃迦叶</u>尊者 、第二<u>阿难</u>尊者、第三<u>商那和修</u>尊者、第四<u>优婆毱多</u>尊者、第五<u>提多</u> <u>迦</u>尊者、第六<u>弥遮迦</u>尊者、第七<u>婆须蜜多</u>尊者、第八<u>佛驮难提</u>尊者、 第九伏驮蜜多尊者、第十<u>胁</u>尊者、十一<u>富那夜奢</u>尊者、十二<u>马鸣</u>大士、十三<u>迦毗摩罗</u>尊者、十四<u>龙树</u>大士、十五<u>迦那提婆</u>尊者、十六<u>罗罗多</u>尊者、十七<u>僧伽难提</u>尊者、十八<u>伽耶舍多</u>尊者、十九<u>鸠摩罗多</u>尊者、二十<u>阁耶多</u>尊者、二十一<u>婆修盘头</u>尊者、二十二<u>摩拏罗</u>尊者、二十三<u>鹤勒那</u>尊者、二十四<u>师子</u>尊者、二十五<u>婆舍斯多</u>尊者、二十六<u>不如蜜多</u>尊者、二十七<u>般若多罗</u>尊者、二十八<u>菩提达摩</u>尊者、二十九<u>慧</u>可大师、三十<u>僧璨</u>大师、三十一道信大师、三十二<u>宏忍</u>大师,惠能是为三十三祖。从上诸祖,各有禀承;汝等向后,递代流传,毋令乖误。"

大师<u>先天</u>二年癸丑岁八月初三日,于<u>国恩寺</u>斋罢,谓诸徒众曰: "汝等各依位坐,吾与汝别。"

法海白言: "和尚留何教法,令后代迷人得见佛性?"

师言:"汝等谛听!后代迷人,若识众生,即是佛性;若不识众生,万劫觅佛难逢。吾今教汝识自心众生,见自心佛性。欲求见佛,但识众生;只为众生迷佛,非是佛迷众生。自性若悟,众生是佛;自性若迷,佛是众生。自性平等,众生是佛;自性邪险,佛是众生。汝等心若险曲,即佛在众生中;一念平直,即是众生成佛。我心自有佛,自佛是真佛;自若无佛心,何处求真佛?汝等自心是佛,更莫狐疑,外无一物而能建立,皆是本心生万种法,故经云:『心生种种法生,心灭种种法灭。』吾今留一偈,与汝等别,名《自性真佛偈》。后代之人识此偈意,自见本心,自成佛道。偈曰:

真如自性是真佛,邪见三毒是魔王; 邪迷之时魔在舍,正见之时佛在堂。 性中邪见三毒生,即是魔王来住舍; 正见自除三毒心,魔变成佛真无假。 法身报身及化身,三身本来是一身; 若向性中能自见,即是成佛菩提因。 本从化身生净性,净性常在化身中; 性使化身行正道,当来圆满真无穷。 淫性本是净性因,除淫即是净性身; 性中各自离五欲,见性刹那即是真。 今生若遇顿教门,忽悟自性见世尊; 若欲修行觅作佛,不知何处拟求真。 若能心中自见真,有真即是成佛因; 不见自性外觅佛,起心总是大痴人。 顿教法门今已留,救度世人须自修; 报汝当来学道者,不作此见大悠悠。"

师说偈己,告曰:"汝等好住,吾灭度后,莫作世情悲泣雨泪, 受人吊问,身着孝服,非吾弟子,亦非正法。但识自本心、见自本性 ,无动无静、无生无灭、无去无来、无是无非、无住无往。恐汝等心 迷,不会吾意,今再嘱汝,令汝见性。吾灭度后,依此修行,如吾在 日。若违吾教,纵吾在世,亦无有益。"复说偈曰:

兀兀不修善,腾腾不造恶; 寂寂断见闻,荡荡心无着。

师说偈已,端坐至三更,忽谓门人曰:"吾行矣。"奄然迁化, 于时异香满室,白虹属地,林木变白,禽兽哀鸣。

十一月,<u>广、韶、新</u>三郡官僚洎门人僧俗争迎真身,莫决所之,乃焚香祷曰: "香烟指处,师所归焉。"时香烟直贯<u>曹溪</u>。十一月十

付嘱品第十

三日迁神龛,并所传衣 而回。次年七月二十五日出龛,弟子<u>方辩</u>以香泥上之。门人忆念取首之记,遂先以铁叶漆布固护师颈入塔,忽于塔内白光出现,直上冲天,三日始散。<u>韶州</u>奏闻奉敕立碑,纪师道行。师春秋七十有六,年二十四传衣,三十九祝发,说法利生三十七载,得旨嗣法者四十三人,悟道超凡者,莫知其数。<u>达摩</u>所传信衣、中宗赐磨衲宝 及<u>方辩</u>塑师真相并道具等,主塔侍者尸之,永镇<u>宝林</u>道场。流传《坛经》,以显宗旨、兴隆三宝、普利群生者。